

GIZARTE ERAGILEEN IRITZIAK



JON HERNÁEZ / ARGAZKI PRESS

ALDERDI ETA SINDIKATU GEHIENAK. PP izan ezik, beste alderdi politiko guztiek hartu zuten parte atzo Bilboko kaleetan. Elkarrekin solastatzeko parada hartu zuten, irudian Gorka Knorr, Joseba Azkarraga eta Tasio Erkizia bezala.

Hezkuntza sektorea eta gizarte osoa elkarturik PPren legearen aurka

Irakasle, ikasle nahiz guraso elkarteak, sindikatu guztiak eta PP ez beste alderdi politikoak ordezkaturik egon ziren manifestazioan

J. Aiertza-I. Ocio | BILBO

Irakaskuntza alorreko erakundeek, PP ez beste alderdi politikoek eta sindikatu guztiek bat eginik, ezohiko irudia erakutsi zuten atzoko manifestazioan, Kalitate Legea salatzen.

ANGELES IZTUETA (Eusko Jaurilaritzako Hezkuntza sailburua)

«Legeak ez du balio gure heziketa sistemaren beharretarako»

«Lege horrek ez du balio gure gizartearen heziketa beharretarako. Gizarteari eskertu nahi diot inposaketaren aurka erakutsi duen hitzartzeko eta erantzuteko ahalmenagatik. Geure autogobernu eta heziketa sistema defenditzen segituko dugu irmotasun demokratiko guztiarekin, eta eskumenak erabiliko ditugu arloko eragileen alde».

XABIER MENDIGUREN (Kontseiluko idazkari nagusia)

«Lege honekin eta beste batzuekin euskarak etorkizun zailagoa du»

«Lege horrekin eta beste batzuekin, etorkizuna zailago daukagu euskara irakasteko eta ikasteko. Lehen asko kostata lortutako bideak eta tresnak

murritzeko arrisku handia daukagu. Orain arte daukagunari eutsi ez ezik, euskarak indar eta bultzada handiagoa behar du, eta lege horrekin atzeratze nabarmena daukagu».

ANTONIO CAMPOS (Ikastolen Elkartearen lehendakaria)

«Hezkuntza sektorea batere kontuan hartu gabe aterako da legea»

«Lege horren aurka gauza batzuk esan daitezke, baina nik bat azpimarratuko nuke: hemen hezkuntza sektore osoa eta euskal gizarte osoa dago ordezkaturik legearen aurka. Legea aurrera aterako da, ordea. Horrek defizit demokratikoa erakusten du, sektorearen iritzia kontuan hartu gabe aterako baita».

BEGOÑA ARRONDO (EILASeko ordezkaria)

«Legeak iraganeko garaietara garamatza»

«PPk lege bateratzailea egiteko ahalegina salatu nahi dugu, proiektuak iraganeko garaietara garamatzalako, eta ez dagoelako hemengo errealitatean oinarrituta. Eskola segregatzailea sortuko du, eta ez du hobetuko ez irakaskuntzaren kalitatea ez irakasleen egoera».

JOSE ANGEL URBIETA (ELAko ordezkaria)

«Legeak ez ditu konponduko hezkuntza sistemaren arazoak»

«Legeak ez ditu hezkuntza sistemaren arazoak konponduko. Bateratzailea eta zentralizatzailea da, ez du gure errealitatea kontuan hartzen. Eta segregatzailea da, ikasleak onen eta txarren artean banatuko ditu. Lege horrek ezin du atera egin».

LURDES URIBARRI (LAB-irakaskuntzako idazkaria)

«Lege hau eta beste batzuk heziketa sistema eraikitzeke oztopo dira»

«Inposatutako lege hau salatu nahi dugu, baita aurreko beste guztiak ere, Unibersitate Legea, Lanbide Heziketakoa eta Humanitateena. Lege horiek geure berezko heziketa sistema eraikitzeke oztopo dira, eta guk sistema hori eraikitzeke eskubidea aldarrikatu nahi dugu».

MIREN ZABALETA (Ikasle Abertzaleen eleduna)

«Legeak ukatu egiten du euskal hezkuntza eredua erabakitzeke eskubidea»

«Guk bi greba orokorretara dei-

tu dugu Lege honen harira, eta erantzuna masiboa izan da. Lege hau eta beste batzuk Espainiako Hezkuntza sistemaren antolaketaren barruan kokatzen ditugu. Espainiako Gobernuaren Lege hauek ukatzen dute Euskal Herriak zein hezkuntza eredu nahi duen erabakitzeke eskubidea».

OSCAR MATUTES (IU-EBko ordezkaria)

«Legearen eredua autoritario eta hierarkizatua da»

«Legea guztiz erreakzionarioa da, frankismo garaia hobeto dagokio sistema demokratikoari baino. Berezitasunak kaltetu egiten ditu, kasu honetan euskal heziketa sistemari erasotzen dio. Horrek agerian utzi du PPren heziketa eredua: autoritarioa, jerarkizatua eta liderrak sortzera zuzendua».

IÑAKI ETXEBERRIA (Sarean taldeko ordezkaria)

«Lege horrekin 25 urteko atzerapausoa emango dugu irakaskuntzan»

«Legea aztertuta, argi dago atzerapausu handia dela irakaskuntzan, 25 urteko atzerapausua esango nuke, eta hori une hauetan barkaezina da. Erreformak oinarri garrantzitsua ezarri zuen, bide hori ez da garatu, eta garatu beharra dagoela uste dugu».

ANA IZAGIRRE (EHIGE guraso elkarteetako presidentea)

«Legeak gurasoen partaidetza deuseztatuko du eskola guztietan»

«Ezin dira gauzak egin gizarte osoa alde batera utzita. Hezkuntza kontutan hartu eta diagnostikoa egin behar da. Euskal Herrian dauzkagun esperientziak eta berrikuntzak kontutan hartu behar dira edozein gauza egiteko, gurekin kontatu behar dute. Lege horrek gure partaidetza guraso bezala deuseztatu nahi du eskola guztietan».

JUAN CARLOS ARETXABALETA (Sortzen-Ikasbatuaz taldeko lehendakaria)

«Legea ez aplikatzeko eskatzen diegu administrazioei»

«Euskal Herriko zentru publikoek PPren inposaketa salatu nahi dugu, eta azken urteetan orain arte elkarrekin lan egin dugun bezala, bihurtik aurrera ere Euskal Herriko berezko heziketa sistemaren alde lanean jarrai dezagun aldarrikatu nahi dugu. Administrazioei eskatu nahi diegu Legea ez aplikatzeko».

TASIO ERKIZIA (Batasuneko kidea)

«Guk geureari eutsi eta eskola propioa eraikitzen jarraitu behar dugu»

«Ez dugu inposaketa gehiago nahi. Lege hau eskola eragile guztien aurka egiten ari dira, eta hainbeste jauntxokeriari hortzak erakutsi behar zaizkie. Guk geureari eutsi behar diogu, Euskal Herrian urte anitz aritu gara ahaleginak egiten eskola propioa eraikitzeke, eta eutsi behar diogu geure proiektuari».

GORKA KNÖRR (EAKo idazkari nagusia)

«Gure heziketa sistema defenditu behar dugu denon artean»

«Gure heziketa sistema defenditzeko mobilizatu behar dugu. Espainiako Gobernuak Lege honekin eraso egin dio euskal heziketa sistemari. Denok elkar hartuta artean buelta eman behar diogu inboluzio demokratiko honi».

ISABEL CELAA (PSE-EEko legebiltzarkidea)

«Legea atzerakoia da, eta kentzeko eskatzen dugu»

«Legea oso atzerakoia da, eta PPri atzera botatzeko eskatzen diogu. LOGSErekin lortutakoa oztopatu egingo du, eta onartzen bada, hurren segregazioa sorraraziko du. Legea akatsa ez ezik bidegabekeria ere bada».